

## **SESSIONI URDINARIA DI U 6 DI FRIVAGHJU DI U 2019**

**N° 2019 / 03**

**QUISTIONI URALE DIPUSITATA DA LIVIU LEANDRI  
À nomu di u gruppu « CUSTRUIMU L'AVVENE »**

**Ughjettu** : U « Domaine de Murtoli »

Sgiò Pridenti di l'Assemblea di Corsica

Sta dumanda tratta di u sviluppu economicu è di a manera di cuncipillu.

Pocu tempu fà, emi vistu cù i ricenti affari trà a SAS Domaine de Murtoli è i tribunali, chì ciò chì ci hè prisintatu com'è un ghjuieddu di a Corsica ( cù u so golf, i so ristoranti, i so casi pà i ricconi, a so spiaghja è u so mari privatizatu ) avia dinò una faccia umbrosa.

Locu di vacanzi pà pulitanti d'ogni mamma, sempre mintuatu in a stampa francesi, spostu vicinu à u situ di Roccapina, nantu à a cumuna di Sartè, stu tempu di u lussu è di u soldu ci hè datu in mudeddu di sviluppu economicu pà a Corsica, un esempiu perfettu di u turismu verdi, cù i so carregghi lunghi viuletti, u « Label » Bio, a so tinuta cù vachi è pecuri.

Sicura, u « Domaine de Murtoli » hè una bedda riiscita economica, ma à chì costu pà a Corsica ?

Chì stu ghjuieddu t'hà ancu a so faccia nera: in lu 2015, un raportu di a DREAL (Direction Régionale de l'Environnement, de l'Amenagement et du Logement) dicia chì u golf di u « Domaine » francaia i limiti di u situ classatu di Roccapina. In soprapiù, una parti di u golf essendu in Zona NATURA 2000, ci saria vulsuta una spirtizia prima di pudè fà custruì, ciò ch'un hè micca stata fatta.

Ùn hè micca a sola cosa chì sdici : In u 2016, u pruprietariu di u « Domaine de Murtoli » hè statu cundannatu à rimetta ind'u so statu naturali un tombulu induva s'era piddatu rena pà custruì u parcorsu di u golf.

In fini, in u 2018 ,l'associu « U Levante » facia sapè chì i dui ristoranti di u « Domaine » ùn aviani micca uttinutu parmessi di custruì ; peghju, u risturantu di a spiaghja, situatu accantu à a foci di u fiumi Urtolu, ùn rispetta micca a leghji litoralì : francatu u fiumi, u dirittu à u passaghju nant'à a spiaghja ... ùn esisti più. U camminu di u litoralì, chì principia in Campumoru, passa da Senetosa, Tizzà, Tradicettu, è u capu di Murtoli, si pianta in a machja, bluccatu da una sarrenda.

A Cullitività di Corsica ùn hà mai dittu nudda par ciò chì tocca à u prublemu di u drittu di passaghju, a libartà di viaghjà, a salvezza d'un patrimoniu ecologicu, storicu, è culturali, è u so libaru accessu. Pinsemi ch'edda saria po ora di falla.

S'è u « Domaine de Murtoli » voli essa un riferimentu pà u sviluppu di a Corsica, s'eddu voli essa un mudeddu pà u turisimu di lussu è ancu pà u turisimu verdi in Corsica, parchì nò ?

Ma ùn a pò fà, caccendu u dirittu à i corsi di girandulà nantu à u cumunu di lu so paesi. Ùn a pò fà senza rispittà a leghji. Ùn a pò fà senza rispittà a natura è l'ambienti.

A noscia dumanda hè fatta di parechji altri : Chì vi ne pari à voi di sti faccendi ? Criditi ch'edda hè pussibili di fà di u « Domaine de Murtoli » un locu di dirittu com' edda devi essa tutta a Corsica ?

Vulariami senta u vosciu parè, à ringrazià vi.